

Dugo najavljivana izgradnja Termoelektrane Banovići trebalo bi da počne do kraja ove godine, potvrdio je za Klix.ba rukovodilac službe za izgradnju TE Banovići Avdija Mumić. Mumić je kazao da pripremne aktivnosti na realizaciji projekta TE Banovići teku predviđenom dinamikom.

Trenutno je u toku zatvaranje finansijske konstrukcije s konzorcijem kineskih banaka, a koji predvodi Industrial and Commercial Bank of China.

Vrijednost cjelokupnog projekta, prema Mumićevim riječima, iznosi blizu 305 mil EUR, od čega će 85% finansirati kineski konzorcij banaka, a preostalih 15% domaće banke.

Trenutno vršimo pročišćavanje svih ugovora. Ugovor u vezi s 85% finansiranja bi do kraja ovog, eventualno početkom idućeg mjeseca, trebao biti parafiran u Kini, kao i ugovor vezan za domaće banke. Nakon parafiranja, ugovori prvo idu na odobrenje Vladi FBiH, a potom i Federalnom parlamentu. Nakon prolaska faze odobravanja, krenut ćemo i u potpisivanje ugovora -istakao je Mumić.

Paralelno s potpisivanjem ugovora, Federalnom ministarstvu prostornog uređenja bit će upućen zahtjev za izdavanje načelnog odobrenja za izgradnju, a Mumić ističe da bi ovaj dio trebalo da bude završen do kraja ljeta.

Nakon toga bismo počeli nivelaciju terena, postavljanje ograda oko prostora za građenje, kao i sve usputne radove. Nakon toga, do kraja ove godine moglo bi se očekivati da počne izvođenje radova na izgradnji TE Banovići - dodao je Mumić.

Prema dokumentaciji, termoelektrana snage 350 MW će zadovoljiti sve smjernice EU iz oblasti ekologije i energetske efikasnosti.

Predviđeno je spaljivanje uglja u tzv. fluidiziranom sloju, a to je jedan sasvim novi sistem spaljivanja uglja koji se pojavio u posljednjih 15-ak godina. Ovakav način spaljivanja garantuje jedan drugačiji razmak u kvalitetu uglja, odnosno on ne mora uvijek biti kvalitetan - pojasnio je sagovornik portala Klix.ba.

Predviđeno je da radovi na gradnji traju 40 mjeseci, a ukoliko počnu u predviđenom roku, TE Banovići bi u rad trebala biti puštena 2021. godine

Izvor: ekapija